



# 60 Propuestas

de política xeneral y compensatoria pa

# L'ASTURIES PERIFÉRICA

1	<a href="#">Entamu</a> .....	3
2	<a href="#">Reversión del retu demográficu</a> .....	5
3	<a href="#">Comunicaciones y enerxía</a> .....	6
4	<a href="#">Sanidá Pública</a> .....	7
5	<a href="#">Enseñancia Pública</a> .....	7
6	<a href="#">Organización social del curiaú</a> .....	8
7	<a href="#">Economía tradicional</a> .....	8
8	<a href="#">Turismu caltenible</a> .....	9
9	<a href="#">Réxime llaboral y fiscal</a> .....	10

## ENTAMU

Andecha Astur creye que les polítiques de los gobiernos asturianos nes caberes décadas resultaron ayenes al necesari criteriu d'equilibriu territorial. Esa disfunción na xestión pública xeneró una situación llamentable ya inxusta: Asturias tien güei una delda hestórica colos conceyos más alloñaos del so centru xeográficu, colos que pudiéremos nomar, con ciñu, territorios periféricos.

Tol Pueblu Asturianu ye quién a dase cuenta d'esta rialidá, de la que son responsables los partíos, d'estremanes orientaciones ideolóxiques, que nestes décadas gobernaron Asturias. Curiosamente, toos ellos yeren organizaciones d'ámbetu estatal, con intereses ayenos a los de les clases populares y trabayaores d' Asturias.

Les consecuencias d'esa llarga falta d'equilibriu territorial son variaes y toes elles de gravedá pa la población de los conceyos afeutaos. Asina hai que señalar la necesidá urxente d'una rede carreteres y viales curiá y segura, la debilidad de la rede de prestación de los sirvicios públicos de sanidá y enseñu, la falta proteición de l'actividá agrícola y ganaera, l'ausencia alternatives al pieslle de mines y térmiques, l'apueste oficial por un turismu masificáu y d'estilu depredador, les consecuencias de la minería a cielu abiertu y del oru, la invasión de los molinos eólicos comu monocultivu enerxéticu, el despoblamientu de villes y aldegues, la migración forciá de la mocedá y l'avieyamientu la población...

Aneciar en más aición política del mesmu calter sedría ñegar el futuru a una parte esencial d' Asturias, dar pasos axigantaos na destrucción de la nuesa identidá y padremuñu y facilitar el proyeutu megalomaníacu del "Área Metropolitana Central", precisamente'l que defenden aquellos que sólo quieren convertir a Asturias nun gran parque temáticu al sirviciu del turismu exterior.

Énte la gravedá de la situación descrita, nun se pue consintir que les úniques actuaciones desendolcaes fasta agora pol Gobiernu d'Adrián Barbón seyan tan insuficientes comu la sola atención de fundimientos y argayos nes carreteres o la intensificación de la propaganda istitucional.

Les tradicionalmente conocíes comu esnales d' Asturias necesiten, con rapidez, polítiques de llargu alcance, xunto con planes inmediatos de compensación. Sólo asina se podrán atayar les consecuencias negatives de tantes décadas de desequilibriu.

Los nuegos conceyos del occidente y del oriente quieren y necesiten caltener l'actividá primario tradicional (agricultura, ganadería, pesca, quesería), defendiéndolo del so sometimientu a toa triba monopolios: del combustible, de les simientes, de los abonos, de la maquinaria básico, de les cuotes pesqueres, de comercialización de los sos productos... Y pa ello existen polítiques alternatives a les que mos ufren los Gobiernos de Madrid y d'Uviéu. Lo mesmo qu'esisten midíes pa favorecer la repoblación, el desendolque rural y modelos de transición productiva, allimentaria y enerxética. O polítiques p'averar el desenrollu teunolóxicu a les fasteres rurales,

p'asegurar comunicaciones viaries de calidá o la so coneutividá dixital, o p'arriquecer los procesos de producción primario con iniciatives d'ellaboración y procesamientu de productos nes propies comarques d'orixe. Esto y tantes otres iniciatives posibles en munches estayes. Dalgo que permitiría fixar la población y nun perder la identidá asturiana que mos ye propia.

La rialidá ye que la situación d'Asturies tien igua. Y la de los sos conceyos más estremaos tamién la tien. Hai alternatives posibles y xente con puxu pa llevales a cabu. D'ehí ñaz esti documentu que compartimos. Un documentu centráu'n dar soluciones. Un documentu fechu por un grupu trabayu formáu por ciudadanos independientes y tamién por presones militantes n'Andecha Astur, pero, en tou casu, xente namorao de la periferia d'Asturies y convencío del so potencial de futuru, tanto comu de lo xusto y urxente que resulta entamar nuees formes polítiques en materia d'equilibriu territorial y planes de compensación.

Esti documentu que ties nes tos manes, considerámoslu un testu abiertu. Abiertu a la reflexón colleutiva, al discutiniu, a la meyora... Abiertu a que se sumen a él cuantos creyan nel so conteníu. Nesa condición esti testu púnxose a disposición del Gobiernu d'Asturies, por si quinxere valorar la puesta'n marcha de dalguna les sos propuestes. Y tamién se ta poniendo'n conocencia de les Cases Conceyu del ocidente y del oriente d'Asturies, asina comu de les organizaciones sociales de toa clas que quieren bien a esta Asturies de la periferia que tanto necesitamos.

4

Febreru, 2023.

ANDECHA ASTUR

## REVERSIÓN DEL RETU DEMOGRÁFICU

1. Negociación d'una Llei de Reversión del Retu Demográficu, apautá colos conceyos que foron convertíos en territorios de sacrificiu, y qu'incluya midíes de requilibriu territorial y garantíes pa les oportunitaes de desendolque y calidá de vida nes fasteres más despoblaes.
2. Plan específicu d'aídes a la mocedá asturiano, emigrao o ñació nel exterior, que faciliten la so torna al país.
3. Planes d'Emplegu Mozo qu'aumenten les posibilidaes d'emplegu y emprendimientu de la mocedá en tolos conceyos, sobro manera nos rurales.
4. Proyeutu pilotu de Renta Básicu pa favorecer la emancipación de la mocedá.
5. Planes específicos d'aída familiar pa la mocedá que tenga fíos.
6. Facilitar la creación nos conceyos de Llares Mozos, comu espacios públicos cedíos a la mocedá'l conceyu y autoxestionaos por ella, destinaos a abellugar les sos iniciatives y actividaes sociales, formatives, culturales, deportives, artístiques, musicales y d'ociu.
7. Favorecer l'acésu a la vivienda de la población mozo.
8. Promover viviendes n'arriendu pa estudiantes con precios sociales.
9. Promover la costrucción de viviendes de preciu básicu pa la mocedá.
10. Facilitar viviendes públiques d'arriendu en réxime de vida comunitario.
11. Prestaciones sociales de vivienda que permitan topar agospiu a les presones que lo necesiten, permitiendo que nun dediquen más d'un 30% los sos ingresos a gastos de vivienda.
12. Ampliación del parque públicu de viviendes n'arriendu.
13. Destinar toles promociones de Vivienda de Proteición Públicu al arriendu.
14. Promover viviendes collaboratives (empobinaes lo mesmo a mocedá qu'a presones mayores, incluyendo esperiencias interxeneracionales).
15. Entamar pa la mocedá actividaes formatives d'adautación a la vida adulto (drechos llaborales básicos, posibilidaes d'emprendimientu, contratos de trabayu, nómines, declaración IRPF, arriendos, hipoteques...).

16. Promover les iniciatives moces d'empresimientu, cooperativismu, proyeutos d'I+D+I ya iniciatives nos conceyos rurales, que favorezan el relevu xeneracional, creando, ente otros medios, Axencies Públiques comarcales d'anovación, incubación y aceleración de proyeutos d'emplegu p'autónomos, cooperatives, pequeñes y medianes empreses, axencies pa les que se regularán mecanismos de participación popular nos sos determinos.
17. Entamar un Sirviçu d'Asesoramientu públicu a la mocedá que presente planes empredeores y de cooperativismu llaboral, con posibilidá de recibir sovenciones parciales pa les sos iniciatives.
18. Facilitar llocales d'alcuentru social nos pueblos y aldegues que nun tengan esi sirviçu.

## **COMUNICACIONES Y ENERXÍA**

19. Aprebación d'un Plan Compensatoriu Especial pa les comunicaciones nos conceyos de los estremos d'Asturies, nel marcu d'una Llei de Comunicación y Movilidad d'Asturies.
20. Revisión urxente d'anchos de carretera, adecuación de firmes, señalización afayaizo y prevención de los riesgos d'argayos y ábanos.
21. Llimpieza finques y caminos vieyos que permita aperiar una bona rede de caminos rurales.
22. El Gobiernu asturianu garantizará la rede de carreteres y caminos llocales nos casos de Cases Conceyu ensin suficientes recursos.
23. Construcción de l'Autovía La Espina-Ponferrada.
24. Desaniciar el peax de l'autopista'l Güerna, torgando la posibilidá d'aplicar peaxes n'otres víes de comunicación asturianas.
25. Ameyorar les rutes, horarios y calidá sirviçu de los tresportes públicos, tanto per carretera comu pela vía (Renfe Cercanías Ancho Métrico, antigua FEVE).
26. Asegurar una bona cobertura en toa Asturies pal usu la conesión a Internet y la telefonía móvil.
27. Moratoria eólica: paralización del llevantamientu de parques eólicos en tol territoriu fasta la existencia d'un Plan Enerxéticu Estratéxicu d'Asturies.

Asina comu prohibición dafechu p'asitiar parques eólicos en llugares protexíos pol so interés medioambiental o arqueolóxicu.

## **SANIDAD PÚBLICA**

28. Rede suficiente de consultorios médicos nes fasteres rurales, con prestaciones afayaíces en materia d'atención primaria, pediatría y xeriatría y retomando l'asistencia presencial.
29. Plantíes sanitaries qu'abasten pa garantizar tanto una correcha atención sanitaria (atención primaria'n centros de salú diferenciá de l'atención d'urxencies a domiciliu), comu los drechos llaborales del presonal (baxes, vacaciones, desplazamientos).
30. Financiación y dotación suficiente de los hospitales periféricos d'Asturies, garantizando, ente otros, los sirvicios de pediatría y xeriatría.
31. Incentivaciones económicques y profesionales pal exerciciu de la sanidá pública nes fasteres rurales.

**7**

## **ENSEÑANCIA PÚBLICA**

32. Inclusión na Rede Educativa Pública Asturiana de les Escueles d'Educación Infantil 0-3, convirtiéndoles nun sirviciu educativu, non asistencial y gratuitu.
33. Redefinición de la Rede de Centros d'Enseñancia Pública, garantizando l'enseñu públicu ensin cupos d'escolinos.
34. Diferenciación d'una Rede d'Escueles Rurales y d'una Rede de Centros Educativos Urbanos, con regulaciones específiques afayaes a la rialidá de caúna.
35. Una política de beques d'estudiu y tresporte específica pa les fasteres rurales de los estremos d'Asturies.
36. Incentivaciones económicques y profesionales pal exerciciu del enseñu públicu nes fasteres rurales.

37. Redefinición de les condiciones de prestación de servicios por parte del transporte escolar en fasteres rurales, asegurando siempre el pagu direutu del so coste por parte la Conseyería d'Educación.

## **ORGANIZACIÓN SOCIAL DEL CURIÁU**

38. Definir una Llei d'Organización Social del Curiáu, con tres oxetivos principales: Asegurar los drechos de la ciudadanía a los curiaos necesarios pa una vida digna. Convertir el Sirviciu d'Aída a Domiciliu nun sirviciu públicu municipal. Garantizar que la prestación de los curiaos necesarios nun seya una carga social que cai enriba les muyeres, asegurando la so plena igualdá en materia d'opciones vitales y de posibilidaes formatives y llaborales.
39. Prestaciones municipales de curiaos acesibles y de calidá, que permita a los familiares que curiaben ocupase d'actividaes productives o trabayos retribuyíos.
40. Aídes específiques pa les presones curiaores a les que l'atención de dependientes (fíos, mayores, enfermos) torga acceder a trabayos retribuyíos.

**8**

## **ECONOMÍA TRADICIONAL**

41. Llei de Proteición de Suelos Agrarios, definiendo les figures de suelu d'altu valor agroecolóxicu y suelu d'interés agrariu.
42. Llei de Transición a l'Actividá Agroecolóxica y a la Soberanía Allimentaria d'Asturies, consensuá col sector agrícola, col sector ganaeru y col pequeñu comerciu.
43. Protexer llegalmente l'actividá agrícola y ganaera familiar n'Asturies, reconociéndoyos la categoría d'actividaes de baxu impautu ambiental y la so compatibilidá con núclios rurales, protexéndola de consecuencias indeseyables que remanen de llexislaciones de cualisquier ámbetu (municipal, asturianu, estatal, européu).



44. Entamu del Conseyu de Padremuñu de l'Agricultura, Ganadería y Pesca tradicionales, pa la tresmisión de los conocimientos de le xeneraciones mayores, facilitando'l relevu na xestión de les actividades productives.
45. Programes d'itinerarios pal relevu xeneracional y non xeneracional nes xunidaes de producción agrícola, ganaera y pesquera, aperiando llínies de sovenciones, formación y asesoría específiques.
46. Llei de Propiedá y Xestión Caltenible de Montes y Biesques d'Asturies, regulando tamién iniciatives de formación específico; incluyendo la torna los montes comunales d'Asturies a les sos tradicionales comunidaes de propietarios vecinales, asina comu l'activación de polítiques forestales que nun hipotequen el seutor a la producción de celulosa.
47. Polítiques actives pa la recuperación de la ganadería de reciella, asina comu midíes de proteición énte la fauna xabaz, con indemnizaciones rápides y xustes en casu de daños por ataque de fauna xabaz.
48. Polítiques actives pa la tresformación d'allimentos llocales, con facilitación de l'autorización sanitario y creación de Centros Comarcales de Tresformación Allimentario, incluyendo planes de formación y la potenciación de la Marca Asturias pa productos propios.
49. Participación pública nun sistema cooperativu social de distribución y venta de productos asturianos (venta en mercaos, en llocales comerciales y al traviés d'Internet), con catálogos comarcales de productores y pequeños comerciantes.
50. Plan de mercaos tradicionales, pequeñu comerciu y consumu d'allimentos llocales, incluyendo actividades de formación.
51. Pautu Social de Precios Allimentarios Xustos.
52. Paralización permanente de la minería a cielu abiertu y de la minería d'oru, polos sos efeutos contaminantes y los sos estrozos medioambientales.

## **TURISMU CALTENIBLE**

53. Aprebación d'una Llei de Turismu Caltenible, que faiga d'ésti una actividá respetuosa col mediu ambiente y la identidá asturiana.

54. Regular un impuestu del turismu caltenible, o ecotasa, que s'aplique nes estancies turístiques p'atender los gastos públicos que xenera l'actividá d'esti sector.
55. Dedicar los fondos recaudaos cola ecotasa a recuperar, rehabilitar y revalorizar espacios emblemáticos d'especial valor ambiental, hestóricu o cultural, a financiar actividaes rellacionaes cola diversificación del modelu económicu, a proyeutos de recuperación del paisax agrariu, a proyeutos de formación, I+D+I y a proyeutos de transición enerxético.

## **RÉXIME LLABORAL Y FISCAL**

56. Redefinición de la política fiscal, de mou que discrimine positivamente caltener la vivienda principal nes fasteres rurales, especialmente nos estremos d'Asturies, asina comu'l regresu a les mesmes.
57. Reconocencia de beneficios fiscales pa l'actividá productiva nos seutores agrícola, ganaeru y pesqueru, asina comu pa la xestión de montes y biesques.
58. Redefinición de la política fiscal, de mou que se discrimine positivamente l'actividá empredeora nos conceyos rurales de los estremos d'Asturies.
59. Línies de sovención pública pa iniciatives particulares d'empresariu qu'aiden a frenar la despoblación o a repoblar los pueblos y aldegues.
60. Facilitar asesoría y formación pal entamu d'iniciatives na fastera rural por parte d'autónomos, cooperatives y pequeños empreses.



[andechainfo@gmail.com](mailto:andechainfo@gmail.com)



[andecha.org](http://andecha.org)



[@andechaastur](https://twitter.com/andechaastur)



[Andecha Astur](https://www.facebook.com/AndechaAstur)



[@andecha\\_astur](https://www.instagram.com/andecha_astur)

